

出使美日秘國日記

出使美日祕崔日記

七月初一日 大青晴

美員某來見言聞中國宜昌府尙不平靜四川亦有會匪滋事美國已造有淺水輪船數艘長二十三丈入水九尺容一千二百噸以備駛行內江且巡緝東西洋各埠云 因查傳教之事終爲中國之患緣教士所到秀民附之而正人惡之其間游手無事之人又欲藉口以激衆怒而爲禍階非水陸兵力之強懾之以威約之以法交涉之事益覺難矣

初二日 陰午刻見雨點

美報言德國新增額兵五萬人民有怨言以增兵必派餉須增餉

一千五百七十五萬圓也前月二十八日俄國來電近有俄國農民二百十八人徙近阿富汗境開墾俄主大悅免其租稅兵役并減其火車之費以招徠云 因查前月俄德方訂通商之約已有成議兩國之交似可益固而德猶增兵額宜民之有怨言也然俄兵已佔巴美爾方規阿富汗其人亦撥重兵以防之近日俄又遷民以實近阿之邊左衝右突英俄戰局如開則德國可無事否則俄挾開疆拓地之願而不能遂安能不顧而之他乎德廷之增兵額誠未可厚非也

初三日晴西初細雨即止

復謁美員某談次聞印度來電言中國駐防阿剌江東邊之小隊

近已撤回惟阿富汗與俄楊統領之兵因相詬詈小有戰局阿兵敗斃七人俄員受傷一人阿兵退紮發白石地方英廷已派兵設防云 因按俄人之所欲者戰也戰而勝則得地即以和局終亦必割地或索兵費二者必有一得也惟美國喧傳中國已棄巴美爾之地此必不確或者巴美爾爲甌脫未隸中國版圖中國力不能爭耳

初四日 晴辰初雨仍霽

前月二十七日伯林來電言有法官三員攜帶二婦於尼西地方遊覽迹似偵探當卽於身畔搜出畫圖卽係該處地勢該員言係遊歷畫圖實爲自用業已拿訊云 因按外國機心機事無時不

有惟有機心者知之所謂惺惺識惺惺也甲申越南之役中法戰局甫開各口礮臺有爲內應以強水澆礮口者且有以釘釘礮門者又有間諜潛悉礮臺形勢知其礮皆外向而自後以攻入者疏節闕目茫無防閑殊可慨也

初五日晴

美外部長照會英國駐美代辦海字云英屬卡拿大於聖迺倫各處運河通美國者船貨一概收稅殊屬不公美國應設法報之茲擬於聖麥利河亦抽收各國船貨之稅云云英代辦答以聖迺倫各處運河之稅請俟徐商革除美外部限以十日英代辦面求再緩未允遂訂九月一號行例 因查交涉之事膠膠擾擾一言以

較之日抵制而已通商之約必曰兩國均益今益於人而損於我則我亦以損人益我者報之其人如願則我以抵制者增我國所收於人之稅其人如不願則我亦以抵制者裁彼國所收於我之稅必使持平方不至賸我以肥彼也此各國交涉無時不有者應加意也

初六日

陰中正仍見日天氣轉涼

美國上下傳聞俄已與中國增立新約於中國通商各口添設領事中國應派公使專駐俄都以合兩大國體制云 因謹按俄爲大國又與中國爲鄰專遣使臣理所應爾惟法國如援例則無以辭之是又不可不遣專使則遣使自此多矣

初七日晴

美廷以哥司答立憂國前加稅則又百之五有礙美商亦於哥船入美口者報以重稅茲哥國自悔已將所加之稅減除美廷現亦除去所加之稅云 因思哥司答立憂中墨洲至小之國耳其民僅十餘萬人入款僅三千餘磅加美國之稅豈不慮美國之啟釁乎不知此內政也美以此啟釁爲無名無理將抱不韙之名於天下則亦惟報之以加稅耳哥以重稅自發其難既不能怨他國而哥商之失利者又歸咎於本國雖欲不除而不能也此致人而不致於人之道也

初八日晴

前日印度昔拉城來電言阿富汗求助於英又言俄人不許英國保護阿富汗又言俄國兵官耶納夫踞守巴美爾不許中國及阿富汗人入境云 因按俄人於亞細亞又進一步矣阿富汗安能敵俄將來自必挫師失地印度藩籬又撤一層而中國西北邊境又加緊焉俄本佳兵而又難制與俄鄰者有不深蠶食之虞乎
初九日晴

阿富汗求助於英英廷衆議紛然以爲一經允許必致兵連禍結泰晤士報謂幫助阿國抗拒強俄爲上策英相格蘭斯登尙在猶豫且謂英廷不願與俄開釁況俄之侵陵阿富汗決不肯休無論中國英國出爲幫助亦難遏止俄人聞阿求助於英已增調兵二

千大礮十二尊備用云 因按前年俄求與阿通商阿人允之英人方以爲憂豈料約立未久兵端旋開然則俄以通商爲名而蠶食其實也阿人方求英爲助而俄人隨即添兵此伐謀之意也英亦懾於強敵而氣餒不敢干預阿其危乎

初十日晴

初四日本司科報言俄因巴美爾地與中國毗連疑於甌脫今應據之以清邊界幸該處華兵現已退出此境初八日彼德堡來電言俄國駐英公使現與英外部長會商願將巴美爾之案從善了結云 因按此似俄人但欲佔巴美爾之地不垂涎阿富汗也其爲真情歟抑將以弛阿富汗之備而怠英之救援歟或懾於英水

師之強而慮水戰不勝歟抑既踞有巴美爾之地不復得隴望蜀歟兵機萬端殊難逆料一是且徐而觀其後

十一日晴

初八日孟買來電言接阿富汗消息阿王已竭力整兵嚴拒俄師以防深入昔南羅山地方不及待英國援兵云 因按俄與阿戰局已成阿若無援安能敵俄自必損兵失地矣惟阿富汗之地折入於俄則印度之藩籬漸薄英不助阿則失印度之勢助阿則招俄君之尤至此實難自處矣

十二日晴

辰刻接紐約沈領事函言美郵政局總辦及狀師請赴紐約有事

相商當卽於已正附車西正到紐美紳等與商董均集領署所商
係美國巡捕近拿罰華人日甚一日稅司逼華人領照領則例成
不領則受逼請予定尋中國如不願與美抵制卽當與美換約此
三事均不可緩因答曰巡捕拿罰華人自當照會外部華人亦應
請狀司控告領照一事領與不領均有利弊蓋領則可無逼迫而
暫安居然新例成而華人不能復返其礙實多不領固可待駁廢
然駁由我而廢由美事不可必因亦不便作主至於抵制換約皆
非公使權力所及之事但備一說未之能行狀司謂領照抵制換
約三事此時姑置之惟巡捕拿罰一事急待拯救請備費用銀三
百圓當爲控除因答曰有把握否狀司答以可使永遠不准拿罰

美紳亦力贊之因遂屬商董先墊付三百圓明日由商家奏還商董欣然給與狀司力任此外悉談時事亥正而散

十三日晴

辰正飯後往謁狀司等聞昨日祕林來電有英國漁船三艘美國一艘在俄界海面捕獵海龍被俄兵船拿獲船均充公漁人三十一名下獄勒令具違例越界私捕之結方行釋放云云言畢辭出卽赴車廠附車西正抵華盛頓使館因謹按左氏云惟無瑕者可以戮人大學云言悖而出者亦悖而入今於美見之矣美禁英漁船越界而美之漁船自行越界是戮人而已實有瑕矣美方以越界責英船而俄旋以越界拿美船是悖出而亦悖入矣美之於

俄可謂恭順之至矣聞俄歲飢運糧以振之輸銀以濟之相距至遠相與至親此卽上年事也乃俄於美員之遊歷者則拘執之於美漁之越界者則拿監之曾不稍寬縱焉乃知交涉之道不恃情而恃勢不論理而論強斯二者天也天實爲之謂之何哉

十四日晴

朝鮮代辦來見其夫人辭行回韓談及英君派兵艦專使等於六月十二號至太平洋之畢太力太國宣諭云大英君嗣後當保護氣耳白島所有土客人等均照常居住并有數事飭畢王速辦一速還積欠商人之銀四萬圓二土人謀殺入英籍之華人何不重辦盜劫者何不嚴追三畢國應改用英旗現畢王一一從命矣

因按過此以往小島之國當無自主者矣太平洋距英甚遠而英所踞之島獨多美國雖以利餌取而勢不及也二十年之外美國將防英乎

十五日 晴中夜子刻小雨

美國嘉省忙得來埠有帆船名好根私運鴉片值三萬圓並華人十九名入口於近埠之華人捕魚所居之村名配司加得地方起岸爲巡船所獲帆船已逃云 因按華人之運鴉片由卡拿大私入者動輒數萬金今由嘉省入者又數萬金被獲者如此則未被獲者必多矣所以然者美關抽鴉片之稅過於成本故走私者但求於三兩次之中一次入口卽已合算故走私者日多而華人之

嗜好此物爲美所鄙亦可見矣

十六日晴

沈領事轉來駐英使館書言俄佔巴美爾地方已與阿富汗開戰局中國駐守之兵亦與交鋒云云 因按阿富汗非俄敵一強一弱故戰局易開英不助阿阿必并入於俄中國之兵與俄交鋒此間尙無聞見然中國鐵路未成調兵轉餉事屬煩難不如俄國之策應靈便恐難操勝算矣

十七日晴小女有美病重似痰閉

德國增兵籌添軍費七十兆馬克於一千八百九十三年加重皮酒煙草出口入口兩項稅則議院尙未批准云 因按此爲防俄

起見也或謂德係防法耳於俄無怨無庸防也不知德之兵力足以敵法所不敢自信者俄耳俄與法合耳故德雖與義奧聯盟而尙慮力之不敵兢兢業業日慎一日以期鞏固封圻然歐洲無隙可乘而亞洲因之不靖俄之所以踞巴美爾而攻阿富汗也

十八日晴

十六日英屬亞得劃來電言俄拘英漁船案已電達英廷謂俄人如此橫行若不卽時報復則將來無所底止云 因謹按以怨報怨之事聖人所不言然孔子以直二字後之釋者或未當也今時報復之說固近於縱橫排闔之爲然不如此則受虐無所抵止是迎合敵國之意而不自恤其民也或曰吾將以息事甯人也則盍

觀宋明之季

十九日晴

昨日巴黎來電言阿非利加洲之達河米國近日好與法國商民爲難屢以兵騷擾之法廷詰問不應乃派兵三千三百人前往問罪所向無敵諒不難滅其國云 因按歐洲諸國分裂阿洲已成破竹之勢達河米國即使如宋之江南卑辭厚幣猶不能存所謂騷擾者或守邊之兵不容法商入境否則法人加之罪耳近年以來小國之被滅者時時聞之如春秋之時將變爲七國矣

二十日晴

墨西哥商民請於政府以美國糧食入口應令納稅以與土產糧

食區別墨總統以前此美墨兩國條約許免美國運糧入口之稅至本年九月三十號爲止當俟期滿之日然後抽美糧食之稅此時未便遽行云 因查稅則一項其用意頗多或僅以收稅爲濟國用者此僅見其小也有固本之稅則防他國之產奪吾民之利者是也如糧食果實草木之類產於天者入口太多則本國之產將棄於地此一端也如綢布衣服器具之類成於人者入口太多則本國之民將失其業此一端也有抵制之稅則防他國之稅賒吾民之利者是也如他國重征我國土產入口之稅則土產無所銷而產於天者失其利成於人者失其業則我國亦必以重稅報之使不致獨擅利權此又一端也此外如煙酒之類珠寶之玩非

民之所賴以生者則重稅之欲使銀錢不耗於無用之物此又一端也若鴉片一種則不但耗銀錢於無用直有害於民生則禁之而已矣此稅則之大畧也

二十一日晴

接金山電商董二人由粵來卽照會外部以免稅關阻滯 美國安奴報禮司埠之國家水師學堂學生學成者頗衆昨山水師部挑選聰敏者三人分派英法兩國船政局學習造船之法云 因查近來歐洲各國多覬覦太平洋顯而有徵美國亦整頓水陸各軍不敢暇逸非復前此之晏安蓋時勢有變遷謀國者當見微而知著也

二十二日

昨日義國來電言美派赴慶賀可倫比亞會之兵船名紐華抵
那埠有水手一名入客寓被毆而斃兇手已獲美外部不卽行文
言義國自當持平辦理不須迫也 因詳觀美國交涉之事而有
以見其心焉同一兵船水手被殺也於智利則迫之於義則待之
美以爲自有權衡矣因以爲可迫則迫之不可迫則不敢迫而待
之耳以言迫智利而智利不受則以兵船迫之以此施之於義美
之兵船不足以迫義也則圖窮匕見不如不迫之不圖窮矣孫武
子曰勇怯勢也強弱形也形格勢禁美亦無如何矣地球之上不
爲形格勢禁者惟俄之陸軍英之水軍而已

二十三日 小雨竟日中夜大雨傾盆

美總統二十日回都與兵部外部會商機要立發公文二道一飭水師提督瓦堪急帶兵艦二艘速赴威內薩國海口拉拉拉一則密封由該提督出口後開閱該提督立帶兵艦出口嗣閱密封知現威國大亂英兵艦三艘泊威國及英屬之亞令拿哥海口勢將干預威事乘威之亂以踞威美國亟宜保護威國陰防英人云因按俄於阿富汗英於威內薩皆欲乘亂以取之英助阿富汗美助威內薩非救災恤鄰之義實唇亡齒寒之憂也英如救阿富汗之災何以乘威內薩之亂用心相反必不然矣通商各國大抵陽以交鄰爲名而陰以拓地爲實惟於富強之國則不敢垂涎弱者

以畏事而多事強者以生事而多事兵不可戢而民遂無休息之時爲可歎也

二十四日晴

美賽會總辦訂於八月初十日赴會所觀禮閱水陸軍操并譙至十四日而止 美國年報紀今年正月至八月止出口煤油計值銀二十六兆八億四萬七千五百八十七圓去年則值銀三十兆一億七萬六千八百七十八圓又核一年之中中國之茶入口計值銀十一兆圓英商細核情形中國所得茶價約三百萬圓商賈行棧約得二百五十萬圓洋商買賣運載利息約五百五十萬圓 因按美國煤油每年值銀三千萬兩可謂鉅款今年遜於去年

者俄出煤油日多奪其利也中國至美之茶售銀一千餘萬業茶者所得不及三之一商賈行棧則中外均有人中國約得其半運載買賣全歸洋人綜計此十一兆中入中國者未及半也由商務不興而無洋輪船讓外國之獨擅其利也

二十五日晴

朝鮮使臣以國王卽位三十年函邀慶賀因率繙譯官踵賀外部大臣及俄法德各國公使代辦均到英廷近遣使赴阿洲之摩洛哥國立約法國尼之以致不行茲法廷派使繼往欲得英國所要之利益英國亦陰尼之云 因謹按當今之世彼此交涉機械變詐無日無之強與弱遇則顯行其要挾之謀強與強遇則隱用

其陷害之術膠擾不息無非欲損人利己而已聖賢處此固不爲害人之計亦必有防患之權則當熟於彼己之情而能思深慮遠方可隨機應變也

二十六日晴

二十五日印度及倫敦陸續來電言俄國駐巴美爾之兵已退出大隊皆入阿富汗國墨黑地方紮定爲持久計阿王亦約白達信德華士華黑口地土旦四國酋長聯絡拒俄俄亦增兵決戰云因按俄阿戰局既開勢成決裂矣欲求其開釁之由則阿并無干犯俄國之事俄人亦無聲罪致討之言直如宋太祖之下江南謂臥榻之側不容他人鼾睡耳然則弱小之國其將何以自存哉

二十七日晴

朝鮮使臣訂宴因晤德國代辦火把根能爲華言言總署大臣徐用於交涉事最爲精細曾與商事故深知之美迫華人領照中國但照行於美教士美必內訐因謝其關切又南墨洲之阿鎮丹公使言近日威內薩國大亂來往護照遂不作憑郵遞公文每被折閱出入貨物勒增餉稅寓威美商被擄勒贖種種無理非兵力懾之難望就範美國兵船到後或可轉機云因按理勢二字相輔而行缺一不可綜觀經史之訓所云逆取順守者先勢後理也所云左德右威者先理後勢也有勢無理謂之以力服人有理無勢謂之不入莫繼太剛則折太柔則廢也

二十八日晴

墨西哥來電言墨國定例天主教堂產業一概無稅因此墨國入天主教者均將產業託諸教堂以免納稅國庫收數日短經費日絀現墨戶部擬請議院革除此例而煙葉煙絲等物均加稅云

因嘗歎墨國之貧也今乃知其治道之不善也天主教向不安分前西班牙之亂亂黨運軍火均用教王封條使不能查此明證也產業免稅則入教者多矣卽未入教者亦冒名入教矣通國皆入教則直無入教矣國用何賴焉查墨戶部大臣卽駐美公使羅美魯也駐美最久蓋十餘年矣熟於交涉之事又熟於美國掌故故毅然改章否則必畏教士之挾制而怯懦不敢行矣

二十九日晴

昨晚晤美紳言美國兵船已抵威內薩海口提督瓦堪尙未到帶領康考船之總兵維脫立飭威國亂黨將以前所擄禁之美國商民卽行釋放云 因於此而歎辦理交涉之不可無兵船也又歎兵船之不可不出洋也威內薩小國耳又與美同洲一水可到其亂黨豈不知美國之強於己國百倍而膽敢擄美國之商民者以兵船未到姑玩之也兵船一到如泰山壓卵不敢稍抗此明效大驗也前日本乘我無備以兵船擾臺灣我之辦理頗爲棘手至索兵費甚鉅此已事也

三十日晴

美國議院議造之頭等戰艦鐵甲巡船各一艘水師部已繪圖招辦惟美國官廠所造各船工劣價費故政府欲歸商辦計兩艦船身需銀七百五十萬圓鋼甲四百五十萬圓二者分廠而造商廠能造鐵甲只二家均在賓省一設別理司咸埠一設比士堡埠美國船廠甚多其爲國家造船者向係賓省費城之克爾廠金山之總鐵廠 因嘗謂機器各廠宜准商人分設蓋至是而益信也以美國議院之權足以節制通國之官雖總統猶從之乃官廠所造之船猶不如商則官辦之真難恃矣嘗讀詩至爾我公田遂及我私又曰言私其縱獻豳於公一則先公後私一則先私後公似不及後世公而忘私之言之爲大矣然因以爲古之語質而後世之

語文古人之語所謂卑之無甚高論可行也惟知其不能無私使之私念遂而公事亦舉卽親親長長而天下平之意也亦商廠之意也

八月初一日 晴夜雨微曉

二十六日倫敦來電言印度政府已派將軍羅柏帶兵赴阿富汗面晤阿王商辦內平國難外拒俄侵云 因按阿富汗爲印度之屏蔽阿滅於俄則印度爲俄臥榻之側矣英不助阿則印度可危助阿則俄人必怒事處兩難實難遽決然考十年前俄土之役英始不助土而終助之實爲大局計也今或仍舊貫歟

初二日 雨中夜大雨

上月二十七日倫敦來電言俄廷請於中國奉天吉林地方設立領事俾西比里亞鐵路成後通商之用中國已允准云 因謹按自中外通商以來奉天一帶雖有教堂尙無領事吉林則洋人尙未駐足其地今則風氣開矣俄之西比里亞鐵路告成外以示通商之便內以遂薦食之謀顯以求貨產之通隱以計轉運之速不僅爲商務籌也

初三日小雨

土國政府現接到俄國照會言土國如不於屬國勃爾加釐亞自行整頓以安商旅俄國卽當代爲整頓不能少緩土廷聞之大恐因嘗言俄國好事共兵勤而無所必有悖心今果然矣其在亞

言 卷十一
洲方逞兵於阿富汗其在歐洲又肆志於土耳其且勃國前君已爲所廢而更立矣何以詰責尙未已耶嘗觀漢魏之季其奸臣柄國廢君立君終不免於禍也勃政似之

初四日 卯初大霧已正而散晴

美國之阿拉司夏地方與英屬可倫比亞毗連向未畫界近兩國政府議定派員查勘畫清界限昨由英國駐美公使照會美外部言英廷已派天文博士一名名經者爲分界委員云 因嘗閱西報言三百年前歐洲教士由陸路遊歷至吉林僅以每日行路若干積之計兩地相距之數殊不足憑蓋途有紆折故也自天文家出以經綫緯綫測地而後得地球之形遂全知地球之里數若干

分而析之遂知各國之里數若干并兩國之界限何處截然分明無所蒙混則測天之爲益大也今英廷測地分界而派天文博士卽此意也

初五日 晴中夜大風

英國預定一千八百九十三年卽光緒十九年用項共第四宗係格致技藝之費獨有加增本年係七百零五萬五千五百六十五磅來年增一百三十四萬三千三十七磅共八百三十七萬六千二百三十一磅 因查前此巴黎賽珍會中國絲綢顧繡瓷器均爲出色皆工藝所成者周禮以考工屬冬官古人未嘗不重工國有六職王公士大夫以下卽及工商至漢乃有賤商之說其實商

之交易多成於工國之賦稅多取於商抑末之言雖大而無當也
英爲地球富國而所重者在格致技藝此明效大驗也

初六日晴

昨日巴黎來電言俄國近有照會詰責土耳其勢將以勃爾加釐
亞之事與土啟釁俄國值饑饉疾疫猶能用兵歐亞兩洲其勢甚
強德君訂於西歷十月九號卽赴奧見奧君託名遊獵實欲奧國
加增兵額以資防俄義國民窮財盡無可設法故德君專注於奧
云 因按俄如封豕長蛇薦食天下鄰近之國小者坐以待亡大
者側足而立歐亞兩洲時局皆視俄人之動靜以爲安危民不能
休兵不能息此亦時勢之無可如何者也且聞俄國整頓水師今

年經費需銀六百二十三萬六千二百八十四磅合中國銀三千萬兩饑饉海臻尙有如許閒欸殊不解也

初七日晴

昨紀俄國整頓水師茲分析其船名價值備考鐵甲三艘一名布拉都達一名博得樓堡勞佛斯科一名賽達斯都堡拉均重一萬一千噸每艘值一百二十三萬磅又一艘重八千八百八十噸值八十九萬四千三百七十五磅快甲船一艘值九十六萬五千九百三十七磅海防甲船二艘均重四千噸快雷船二艘一名倭烏代一名普克達尼格每艘值十二萬五千磅雷船一艘名葛里敦值七萬五千磅信船二艘一值二十二萬五千磅一值十五萬磅

雷船十艘又有鐵甲五艘一名高古特一名訥窪林一名卓爾志
博一名理深慈一名都愛拉烏又快甲船名祿里克防海甲船二
艘一名奧得窪則尼一名格里墨得斯吉均將陸續下水云 因
查俄之水師如此過此以往雖不逮英法將駕義大利而上之其
志不在小矣

初八日晴

接外部照會言英屬卡拿大有華人二名潛入美境搜其身得票
布二張訊之有入會情事特將票布并案情移來因閱該票布大
小二張其字循環成行文理不可解惟洪字可認識則係粵匪餘
黨票上有血跡有針則爲刺血拜盟之證二人皆粵籍則與鬧教

之湖南籍者不同類其針織細而有帽卽係美國所用之針爲中國所無則刺血拜盟係在美國地方可想其票布上之字係石印更可決其在美所爲卽以此意照覆外部矣

初九日晴

美國祕林海峽自美總統議員禁英人捕海龍拘英漁船英廷爭之不理英人亦拘美國漁船從此英美兩國互拘漁船英廷初意願請局外之國評論美總統外部不允至今年夏始允乃俄人又拘英美兩國之漁船層見疊出且將船中所有之海龍皮充公又拘漁人至俄坐監至是始有釋回者漁人川資不足幾爲餓殍各訴本國英美二國又各向俄廷詰問云 因按祕林海峽捕魚之

案自美敗之而英爭之幾兩年矣英美兩國互拘之船各有抵制
尙無陵虐之處俄最強又無漁船在祕林英美無可報復故陵虐
之英美均失國體矣

初十日晴

狀師梅來見 美議院議新增兵艦已交本國船廠照造限三年
而成一爲容九千噸之戰艦每一時行三十二海里一爲鐵甲容
八千噸每一時行四十海里如能加速四分之一則加銀五萬圓
如減速四分之一則減銀五萬圓二船之價約八百萬圓 因按
每一時行四十海里爲中國一百三十餘里可謂速矣加速四之
一則加至三十餘里矣未必能也然有以獎之或激於賞而盡力

求速正未可知且減速則減五萬圓造此船者斷不敢草率以搪抵也中國方興海軍如訂造兵船似可仿此辦法庶有益而無損矣

十一日晴

英例居民家畜一犬納稅三圓領取牌照美例納稅二圓出使人員向例免稅而須報明由稅員送與牌照茲美國駐英李立斯土之領事拉失陸畜犬未領牌照英稅員已控於戶部美廷聞之遂查英國公使畜犬亦未領取牌照擬將辨駁云 因按居民家畜一犬納稅二圓至三圓可謂重矣收稅而及於犬可謂苛矣出使人員所畜之犬例准免稅而漏未領牌照可謂毛舉細故矣而英

言 卷一
稅司居然控於戶部美廷又查本國稅例以相抵制可謂小題大做矣而兩國均不肯鬆勁者則何耶講交涉者當知之

十二日晴

謁律司梅談及倫敦有信言接中國天津來電謂俄國駐紮巴滿爾提督名耶納夫略地至奴隆地方適與中國邊兵相值當卽分兵前往接仗云 因按此言如果屬實則中俄邊境已有釁端而俄人居然加兵二國矣然審其大勢仍專重於歐洲而亞洲之兵尙非大隊如與土耳其開釁則三國均受其兵俄人之志不小矣
十三日晴

俄屬華沙埠來電言接俄都消息謂俄德兩國邦交本不洽涉各

匿怨恨之心惟尙未顯露耳而現在情形又非從前幾於不能忍耐云 因按俄已攻阿富汗矣又拘英之漁船矣不畏英之決裂乎又似與中國邊境啟釁矣今又與德不和然則俄近日之所最合者其惟法乎因故謂其遠交而近攻也俄人舉動如秦而法人乃欲效齊與燕耶

十四日晴

昨日羅馬來電言義國人民在巴西國爲工商者近有稟呈外部計數千名言巴西國之苛虐巡捕尤甚故求伸理又有商人以所失貨物向巴西國家賠償其數甚鉅該國均置之不理義外部已允爲詰問矣 因按巴西國前此求與中國立約意在招工此約

已成而招工之舉只允華民自往不許巴西自招華人知巴西之無政亦無往者寓美之猶太人往者均失業無依已由美國給資招回查巴西與美國同處墨洲而荒土之未墾者猶十之九乃竟不得善法以開墾焉大學言有人有土中庸言人存政舉旨哉斯言

十五日晴

設醮 美國卑士穆地方鐵廠工人糾衆停工爲亂有不從者輒戕之該處鐵廠共需用工人十五萬名有零地方官立派巡差三百人保護未附和停工之工人亂黨拒之相持不下云 因謹按中國之利出於農外國之利出於工中國之利興於人力外國之

利興於機器以人照料機器一人之力可當百人美國卑士穆一處鐵廠已用工人十五萬名此一千五百萬人所出之手藝也歐墨兩洲運至中國各貨物無非機器所成乃至比利時小國民數僅五兆而用鑛工至九萬餘名宜其國小而富哉

十六日晴

美戶部查通國民人產業共值銀一萬二千七百二十九兆零六十萬磅因查三十年前則值銀二千四百十六兆零八十萬磅二十年前增至六千零十二兆六十萬磅十年前又增至八千七百二十八兆零四十萬磅云 因按美國之富較三十年前幾六倍矣鐵路之利也實華人之功也現在使館自出使大臣鄭藻初

賃至今十年當其賃時使館左右第宅甚稀居人鮮少皆一片荒地耳十年之間築室已滿因到此甫三年則見館後已增一宅館左又增兩巨宅館前亦增數宅月盛日新正未艾也考其設施大抵興商務修農政開各礦立製造局講求入口之稅使利之所在不棄於地不漏於厄不奪於他國而已

十七日晴

昨查美國通國產業誠爲富饒因又查英國之產現在合各屬及各處通商埠頭計共值銀一萬零七百八十一兆五十萬磅查前三十年則僅值六千一百十三兆磅前二十年值八千五百四十八兆磅前十年則值一萬零三十七兆磅 因按以英較美則三

十年前實勝於美現在乃不如美英之進境遲而美之進境速也然美國多英人而英國無美人則美之產業英人亦必有之其富當可相抗矣

十八日 晴夜小雨

美國議院撥款銀十萬圓以備本國兵艦在太平洋薩摩阿島建設添煤之地又查地球有水師之國添煤地方若干查得英國最多美國最少現僅有墨西哥檀香山薩摩阿島三處云 因嘗論籌海軍難籌添煤之地尤難以無煤則兵艦不能行也又嘗論美國之富籌海軍不難而籌添煤之地仍難以佔則兵力不足購則急切不能得也薩摩阿島處太平洋就其切近者而圖之先所急

也聞仍需向原主購地共議購也必有需索之處居奇之價則急切不能得之證矣

十九日陰

已初附火車赴紐約可倫比亞之會因查可倫比亞係義大利人而仕於日斯巴尼亞前四百年卽西歷一千四百九十二年可倫比亞悟得地球全勢不盡於大西洋逾大西洋必有土地請於日主給資備船泛大西洋向西覓之日主爲之備船及半年之糧暨從人使往是時輪船未興僅恃風帆共行甚滯西行三月仍屬大海茫茫而糧已耗其半不敢前行乃返國日主不加詰責可倫比亞以未見功爲恥再請於日主日主仍令往遂有好事者助之資

斧多備糧食足支年餘遂行泛大洋三月後忽見飛禽翔於空際
可俞比亞大喜曰離岸不遠矣越三日遂抵岸卽中墨洲之地今
之可俞比亞國因此地初得卽以人名名之因赴祕過其國則可
俞比亞有塚存焉岸上皆野人面如古銅色卽今之煙甸人也可
俞比亞率從人騎馬帶兵器上岸土人見其下有四足上有二首
大駭而奔可俞比亞遂據其地返報日主漸闢漸廣此初得墨洲
之事蹟也

二十日晴

會總送到入門票因於巳初偕繙譯巡捕往則人民熙攘擁擠街
衢爲塞遂遶道而往至坐定則見巡捕兩隊或騎或步清道而前

以後則各學塾學生武備院學生律例院學生育嬰堂男女約三百餘隊每隊人數少者六十名多者百二十名不等各塾學生爲最多女工院只一隊育嬰堂男女各二隊武備院皆肩槍間有握刀持戈者各自爲隊每數隊間以軍樂各學生多徒手或肩小旗每一隊有隊長二人領之齊其步不使參差其行也如雁字橫排而前其手皆垂其足之步皆畫一凡左足前則一隊皆然另有槍隊數百人爲一方陣隊長居前後中旗指前則皆步而前旗指後則轉身步而後槍向後進退整齊至申正而畢

二十一日晴

辰正僱馬車行至海邊則水師提督已派總辦具輪船相待副總

統內部外部戶部農部兵部水師部各大臣均陸續而到俄德葡土耳其南墨洲各公使英總領事均到遂展輪出海約行數十里則兵船漸多法國鐵艦二艘義大利一艘日斯巴尼亞一艘餘未見國旗不盡悉大約美國兵船爲多商船遊船尤多約共二百五十餘艘各船皆奏樂因等坐船居中各船環繞而過過時吹氣笛本船亦以氣笛答之以後遊船多奏樂兵船則升礮救火船則噴水高約四丈遠五六丈水雷船爲極速多由各船相閒處穿行而過至申初返輪申正抵岸

二十二日晴

赴會其隊與二十日相同而人數較多整齊亦勝於前聞共計三

日

記

卷十二

二十四

萬三千名其中弁兵一萬九千零八十名救火會及各會館幫共一萬二千餘名水師提督總辦訂明日赴醴因以本館有照會外部駁例事辭不能赴卽附火車回美都戌刻抵使館

二十三日晴

十八日報言歐洲各國初與日本立約其情與中國同挾其強梁肆意要挾約款有各國人民在日本犯法則由各國領事究辦無不漏網日本爲之束手乃至葡國之貧弱亦效尤橫行其犯法漏網者極多日本雖照會而葡置不禮茲日本以此關繫國體卽照知葡政府謂葡國既背約則以前兩國之約作爲廢紙以後葡民在日犯法者由日本地方照例辦理云云日廷此舉誠自強矣

因嘗謂萬國公法各國條約如中國各部之律例頭頭是道惟強國能以責弱國弱國不能以責強國也卽能責之而強國或游移其說或文飾其情甚且置之不理故外國有抵制之法有報復之法甚且有以勢伸理之法勢伸而理與俱伸矣然亦惟強國能之非所論於弱國也弱國則勢屈而理與俱屈耳

二十四日晴

前赴會時在舟聞某紳言美與三德明哥所立之約英法德三國如之响喝三廷以爲宜廢三廷置之不理英法已有公文詰責德國則以三國煙葉售於德者得利甚厚擬限制之美國則聲言此事有關通商決不相讓云 因嘗謂強國與弱國通商大率要挾

賡削而已近年歐洲各大國皆垂涎於墨洲而美國亦不少讓夫墨洲之大國僅美利堅一國耳此外皆貧弱不能自立貨棄於地利讓於人其民數甚微其武備皆弛以前美國無兼併之意歐洲亦無賡削之心今則皆虎視眈眈其欲逐逐數十年後墨洲小國必如漢陽諸姬矣

二十五日晴

前二日羅馬來電義主諭散議院令國人另行公舉明年兵費需銀三千九百三十六萬圓較以前數年爲大減連售煤油則歸官辦云 因查泰西各國議院所議與國君意齟齬者則國君有散議院另舉之權義主之諭散議院自以兵費之故義主以爲設備

議院以爲病民也因詳察義國近日情形實有民窮財盡之勢而猶悉索敝賦以經武爲亟者實以俄之不可不防也煤油之運售歸官亦似奪民之利議院之不悅應爾然義國政府之出於此者亦實無可如何耳

二十六日晴

二十四日羅馬來電言天主教會普天同慶屆期教中人躬赴羅馬致賀法國所割與德國之阿爾薩斯省人民初擬取道瑞士赴會繼因路險改由法國德政府聞之大怒天主教監督恐生事端遂諭民人勿赴會云 因查天主教之寓各國固最猖獗者也獨於德國最馴法國之護天主教又最強梁者也獨於德國最謹世

俗人情驕者常諂驕其所可驕而諂其所當諂也金人慢宋主而畏元人板升擾明邊而畏俺答曠觀千古前後合符有志者可知所從事矣

二十七日晴

美戶部查本年正月至八月底進口貨物值銀五萬八千萬圓零較上年多一千五百萬圓零出口貨物值銀五萬九千一百萬圓零較上年多四千六百萬圓零出入兩比出口之貨多一千一百萬圓零云 因查美國入口貨物至值銀五萬萬餘未嘗不多而出口之貨足以抵之且多一千一百萬焉則銀錢不外漏而尙有贏餘矣歐墨二洲富強之國大抵如斯其弱小不振者則入口之

貨多於出口出口之銀多於入口由商務不興民力棄於閒而物產棄於地也

二十八日晴

參贊彭光譽繙譯容揆赴希卡果觀賽會之禮 美紳謂南北花旗擣兵後商船之利幾爲歐洲所奪近擬設法收回前此議院議定准美商所購外國之船改懸美旗矣向來美國郵政凡書信往來例由最速之船計程一米給費四圓每年往來歐洲需銀一百二十五萬圓此項鉅款悉爲歐洲商船所得近飭輪船公司造快輪五艘限三年內陸續造成往來歐洲收回郵政之利云 因謹按立法無久而不敝者但聽其敝則敝者愈敝能救其敝則敝者

亦利嘗見善治家者凡有益於家之事纖細必舉凡有損於家之事纖細必除不數十年富家大吉矣卽小可以見大治國通於治家勿謂外洋之計算爲可鄙也

二十九日晴

西報言日本制作日精大阪製銅鐵器東京製綢布橫濱製酒火柴等物其價甚廉故能運出外洋銷售德國已畏其奪本國之利矣 因嘗遊美都之市見有粵人列肆者自謂出售中國貨物詳細察之則瓷器古銅綢巾茶葉等物皆來自日本者問其何以不售內地土產則曰稅重價昂不能銷也閱此報因附記之

三十日晴

美廷近接太平洋吉白海島書言英國強佔其島後自任保護且限制該島之美商島主以前屢求美廷保護美置不理云云外部科士達言美國開國定例不准強佔他國土地故於保護無權旅該島美商未言英之苛制未便向英曉舌如英實有妨礙美商情形自當詰問耳 因按美外部之言可謂不多事者然亦海軍之力限之也美之兵船尙不如日安敢與英抗哉審己量力苟非大不得已者聽之可也

九月初一日晴

美國駐英領事名老耶士告假回美言自美國增入口稅以來英之黑特士飛城居民十二萬業紡織者盡已失業其他利次埠亞

爾黑埠那丁黑埠情形畧同有欲徙紡織局至紐約者有欲徙往印度者蓋拮据萬分矣英報因言前總統基利芬之體恤商務云因接美加各國入口之稅頗聞怨言而各國惟聞抵制而不聞爭辨者稅課爲國之內政例可自主也英之紡織局可謂窘矣而不聞以改章請於美廷則交涉之事可見矣

初二日晴戊刻見雨點

伯林來電言德主於二十一日抵奧奧主率大臣躬迎行接臂之禮同車入宮設醴并同觀劇惟所商何事祕密不揚二十五日俄國調回駐德使署之武員德亦如之蓋德國使署人員俄廷暗派人偵其動靜凡機密之事均不使知故乘此時調回云因按數

年以來德國親奧義以防俄俄主銜之確有形迹近年則益齟齬
矣阿富汗土耳其波斯之恭順於俄亦確有形迹近更無敢戲渝
矣乃俄不用兵於德而用兵於阿不知者或謂俄主之好惡顛倒
而其實不然也法爲德挫至於國亡君虜至今二十二年乃法人
之武僅加於突尼斯馬達加斯加越南阿非利加達河米諸遠國
而近者無聞焉其揆一也

初三日

卯刻小雨卽止仍晴

美國礦學家言地球產煤之地至多其深者非機器不能得法國
煤礦有在一百丈以下者比國則開至一百八十丈英國採至三
百一十丈而不盡德國又有開至四百一十丈者統計地球之煤

當以中國爲多且爲易採云 因嘗閱同文館教習丁韪良所論泰西礦務有鑛至深二百丈者準以今之所聞尙爲淺也或者歐洲煤礦漸採漸希故不得不深求之但不知其深者採盡以後更何所恃也中國所蘊之煤抵歐洲全洲五倍及今而講礦學將來能操歐洲之利權矣

初四日晴

倫敦來電言英國前任外部於交涉事務願助德奧義三盟國以制俄法今新任外部不以爲然已密告法國政府如俄法與德奧義構兵英國決意守局外之例云 因按此歐洲之變局而英之用意殊難測也將以爲守公法乎而本年干預威內薩之政佔太

平洋之島其違公法者正多也將不欲德法各國之休養生息以增其富強乎則與英后前此所言不嗜殺人之意相悖也且俄法兩國如憚英之制而不動兵則聞此言而將與德奧義啟釁如憚德奧義之合縱而不動兵則英雖有言亦未必遽敢啟釁也誠不解也

初五日晴

聞美總統后薨差人持名帖往唁當卽發電於總理衙門云美總統妻薨請示因微 初三日伯林來電言德奧義三國聯盟近日以增兵爲第一要務義國財竭民疲軍費無出奧君以籌餉不易不願增兵德主無法可施惟有本國增兵而已現已飭相臣格布

理按年增募新兵六萬人增餉一百餘萬圓交議院議之惟慮議院以民力難勝未必議准云 因嘗言歐洲各國講武自防爲騎虎難下之勢實難持久今已見支絀之形矣德奧義三國不合則不能敵俄法法不合俄又不能敵德兩勢相敵則思有以勝之遂謀增兵彼增而我不增則無以自防又無以求勝遂至相率而增莫能相下無所底止奧義兩國處不能不增之時而已有不能增之勢形見勢絀可奈何哉

初六日晴

午刻因偕繙譯往外部衙門慰唁總統 聞英屬卡拿大以土產入法國稅重於各邦請於英廷英廷特派專使名脫伯至法協同

英國駐法公使德福林與法廷訂立報施之約法廷已允卽日商議云 因按卡拿大英國一屬土耳其民數鮮少所興之利度亦不能多也而能請於英廷英廷遂爲派專使所謂有害必去有利必興也不以害小而不取不以利小而不興泰西之謀國者如是而已

初七日晴

美於太平洋慮水師無添煤之處竭力籌之查得薩摩海島之索哥白科地方可建埠頭請諸該島之政府已如所請卽於今日招工承辦限一年半造成云 因嘗言兵艦以煤爲氣非煤不行又言美國海軍實不足恃以鐵甲不多而又無添煤之所也今由議

院議增鐵甲而卽籌各處添煤之所可謂知所急矣

初八日晴

檀香山島主願與中國立約不允其島地曠人稀中國民人趨之若鶩島主乃立苛例以限制其利益又暗通華人之黠者招之使來華人不知貿貿然來來則受其苛虐日本國已與該島立約華人寓該島之便利遂遠不如日本華商等稟求救援已數十次矣不得已爲之轉託美外部由其駐檀公使領事等保護自正月與商至今始妥從此華人當可安居矣

初九日晴

英國於光緒十六年估十七年用項計九千零二十六萬四千磅

茲於十八年核計實銷八千九百九十二萬八千磅因考十八年
入款計有九千零九十九萬五千磅出入兩抵仍贏餘五十六萬
五千磅云 因按泰西各國均預定來年用項以爲入款量出爲
入也顧用項至需九千萬磅餘則計銀四萬萬兩餘可謂多矣而
入款尙贏焉則取諸民者尤多矣非商務之盛民產之富不能也
然則富爲強之本也商務民產爲國之本也 酉正接總理衙門
電云優妓赴會大傷國體何繙譯偕陳姓往商殊荒謬尊處應卽
禁阻何待請示儻敢陽奉陰違定將經辦之員查究青當卽以此
電分札繙譯何慎之及金山總領事矣

初十日晴

又查英國進項所自分析計之則關稅共銀一萬萬圓土產及國內銷用貨物稅一萬二千萬圓契紙票稅六千五百萬圓官民進款抽稅六千萬圓郵政入款四千五百萬圓電報入款一千萬圓地租田租房稅雜稅四千五百萬圓以上共計四萬四千五百萬圓 因按英國進項每年四萬餘萬圓不知其底細者必以爲難及以因考之除官民入款抽稅外其餘似皆可仿惟煙茶兩稅不能若是之多耳然鴉片稅實足以抵之英國煙稅年徵銀一千零六萬五千磅茶稅年徵三百四十七萬磅苦酒稅年徵九百四十萬磅燒酒稅年徵一千五百七十萬磅茶煙酒三項幾及銀二萬萬圓已抵所入全數之半泰西各國皆以此三者非民生日用所

必需故有意重其稅也中國煙酒皆無稅則入欸之短者此其一也

十一日晴

昨考英國入欸因論泰西煙酒茶之稅茲并計其價值因於煙向不入口洋酒亦不敢近以其冷飲於脾胃不宜也近辦茶會及頻醺美官紳故知其價煙之小者其形如小筆帽每枝計銀一分其味美者價倍之大者如聯筆之帽每枝計銀五分其美者計銀五錢上下不等酒之至賤者每十二兩計銀一錢醺客不用等而上之以至於每瓶五兩名爲香冰紳富之醺客大抵皆用此種每一茶會需二三百瓶茶之次者每十二兩計銀一兩佳者未見計其

價目則知其稅之重矣

十二日 卯刻稍見細點晴

查光緒八年英國購中國茶計一萬一千四百四十六萬磅購印度茶計五百四十九萬磅至光緒十七年則購中國茶五千二百萬磅已減過半購印度錫蘭茶一萬五千萬磅已加至三十倍蓋綠茶樹至三年後其味卽劣印度錫蘭能於三年後另植故仍佳也中國如能講求則不讓印度矣 因考泰西農政不僅講求播種五穀也教習丁墾良嘗言之以此徵之益信

十三日 將曉有細雨仍止晴

十一日報言美國籌民生國計以商務爲本而貨物往來必需舟

車大西洋往來輪船之利惜爲歐洲所奪幸內地各口均不准行此項利權仍歸本國查前十年北邊大湖輪船載七十一萬一千二百六十九噸本年增至一百一十八萬三千五百八十二噸又有鐵路接濟故利源不漏卮云 因按美國東西兩洋西洋之利奪於歐洲則失其半而存其半內地之利絕無漏卮故元氣不傷而國計民生仍充裕也中國外洋之利既全漏卮內江之利僅收回三之一比而論之則失算多矣

十四日

卯刻小雨如霧陰

昨日倫敦來電言聞美國鐵廠近得鐵甲新法其堅異常水師部特購一塊昨在波士模海口試驗將鐵甲造成一板高八英尺闊

六英尺厚一英尺半以六英寸口門大礮一百磅彈轟擊五次該鐵甲無恙而彈已碰碎英國擬仿造云 因查丁韋良言泰西之學不泥古而以日新爲主頗有非之者顧窮變通久已見於易器非求舊亦見於書孔子以生今反古爲非氣運日新爲治者自應與爲轉移亦猶晝夜寒暑之遞嬗耳夫言豈一端而已固當有所當也

十五日晨起大霧晴

新聞述德京報言法國自一千八百七十年

即與德構兵之年

至今二十

二年練兵之費計美銀三十八萬萬圓而償還德國兵費銀十萬萬圓尙在此外近日法戶部籌餉飭通國造腳踏車清冊計二十

二萬五千餘輛每輛按年納稅銀二圓可四十五萬圓郵局電局發信收信之人亦納半稅云 因嘗言泰西各國練兵自固勢成騎虎支持難久近聞義日諸國已見支絀之形奧亦漸窘德法雖可支持而歲歲增兵籌餉亦覺喫緊民不可息受困胡底將有富強之國出而乘其敝者殊可慮也

十六日晴

伯林來電言議員新議一例凡各國皮酒運入德國口岸者議加重稅以杜其來每成本百圓抽稅五十圓云 因查中國於洋酒入口無稅乃至鴉片入口其稅亦輕李傅相稍議增加英使威妥瑪卽肆挾持非李鴻 以堅定持之幾爲所奪矣夫皮酒爲糧食

之類無害於人德國收稅欲加則加鴉片者害人之物也泰西各國皆禁入口美國則按磅收稅十二圓視成本已三倍之中國照此以收稅則入銀一萬萬兩卽照德國收皮酒之稅亦入銀四千萬兩矣但須俟武備增修以後耳

十七日晴

聞秋初俄國兵船於浙江甯波招寶山海口外測量海道嗣又有英國德國兵船亦至該處測海云 因查泰西兵船所過之地往往測海蓋亦閒中一著碁也方今中外尙少齟齬雖不必爲杞人之過慮亦不可無未雨之綢繆憶道光二十一年英人先陷招寶山次陷金雞山以次陷鎮海甯波定海蓋以此地爲浙海之門戶

而江閩之中權也

十八日 小雨地溼

昨日羅馬來電言俄國聞德國增兵籌餉亦擬增兵以防外侮又倫敦來電言俄國向各國借貸無一成議近又向法國富商議借英金二千萬磅按年納息四釐以九十六磅作爲一百未允繼減至九十磅仍未允云 因查歐洲各國增兵角勝已成騎虎難下俄值饑饉告貸無門亦議增兵自固時事可知二十年前俄之告貸有以六十一磅作爲百磅者折扣之重至於此極然則俄之立國其強可畏其窮亦可畏也

十九日晴

拜發三年期滿保獎

奏摺 美國太平洋輪船名馬立怕薩從薩摩亞島行抵金山途經裴奚島相距五百里之島名愛立斯有英兵艦名扣拉岡在該島停泊聞將設埠屯煤云 因按美國於前月方謀於薩摩亞島建埠以備屯煤而英人乃於相距不遠之愛立斯島亦謀設埠可謂明者所見略同但一攻一守耳且英人已於前月得保護吉白海島之權是太平洋形勢所得已多將來英美啟釁水師之力美不敵英矣

二十日 小雨帶雪子

美各省舉總統已舉定基利芬查基利芬卽前四年之總統也

十八日倫敦來電言法國已與摩洛哥國立約名爲聯盟實則保護云 因聞前此英法二國爭摩洛哥之權英欲保護法人尼之茲竟歸法人保護可謂如願以償摩洛哥國距新加坡不遠法人於越南之外又得一土地矣數年以來小國之不能自保者頗多亦兼并之習使然也

二十一日 小雨午後晴

聞英國鐵艦名好威失事沈沒該船造成計銀三百餘萬兩俄國造成鐵艦一艘定於十一月三號試水船名羅利長四十三丈五尺廣六丈七尺容一萬九百三十三噸機器馬力一萬三千二百五十匹自克龍斯達至琿春計海程一萬六千米中途雖無儲煤

之地不慮缺煤又美國新式兵艦六艘現由官廠日夜加工以期
卽日告成云 因按英法俄德四國水師本強美自知不強極力
整頓幸本國各廠林立取諸宮中故能日有起色如此十年當可
與法俄抗矣而英所失鐵艦計值銀三百餘萬圓十年成之一朝
毀之泰西以此爲銷金之鍋信矣

二十二日 細雨陰晴不定

美國駐檀香山公使來信言檀國地跨八島懸太平洋中爲亞墨
兩洲要道英國以其扼要久思蠶食而礙於美美商之寓該國者
千餘人地方官多美籍故親美國如美之附庸前二年查核民數
男女共九萬一百六十一名口土著三萬五千零二十人華人一

萬四千五百六十人日本一萬一千七百八十人又考十三年前
土著約四十萬人日漸凋零將來必無遺類察看該國時事難保
自主之權商民均願歸美保護云 因謹按氣運日新而不新者
遂如親盡之廟不特國運之興廢由之卽民種之存亡亦繫焉居
恒營慕上古渾噩之世恨不親見今乃於荒島頻見之無機心無
機事榛榛狉狉是眞天不變俗亦不變者何以不能自存耶豈天
道之難知耶抑人事之未盡也

二十三日晴

檀香山來信言檀島女主以民心不靖議院不服已派律政部大
臣紐曼來美求美保護美外部立邀各部聚議所以待之之道一

面電達金山以前日調派駐檀兵艦赴薩摩島之事暫且從緩勿
行另以蘭吉兵艦代之云 因按華人之寓檀香山者以無約故
數被虐政屢稟求援 因雖謁檀國駐美公使婉言相託而檀國政
府時時反覆終不可恃乃函商總理衙門決計轉託駐檀美使保
護總署既以爲是因卽商之美外部外部行文檀島已允照行今
檀國內亂華人有保護者當可晏然矣

二十四日晴

檀香山議院欲廢女主哥斯答立愛國山水大發所損甚鉅民心
叛亂欲廢其主祕魯因與智利阿鎮丹二國齟齬新購槍十萬枝
增修武備將開戰局云 因查此皆太平洋墨洲之國也美國晏

然無事而各國膠擾不休非貧則弱宜檀香山女主欲求美國保護也同處一洲而治與亂判若冰炭則其人共政不同耳曠覽墨洲大局將來衆小國均將折入於美矣

二十五日陰

昨日維也納來電言俄儲於二十三日到奧奧君親率部臣赴車廠躬迎俄儲與奧外部長子爵容那蓋晤談半時奧君醺俄儲於宮中并偕觀劇又巴黎報言俄法聯盟之約已於二十二日簽押互換云 因按俄法聯盟之舉法界英德二國之間或有戒心藉以防患俄非有所懼於德也俄不犯德德必不犯俄然則德奧義三國聯盟實以防敵法國之意諒亦相同惟俄則不然是俄固奧

白 言 卷十一
之患也乃俄儲至奧而奧君禮意有加焉雖曰以篤邦交而亦出於不得已矣

二十六日 小雨天暖

英國卡拿大公司來見言巴西國現欲向中華招工該國可容百餘萬人請爲致意中華地方官准其舉辦因謂中巴立約已載明不准招工只准華人自往如巴西國優待客民客民得利自然不招而往招工之說有違兩國之約不便准行該公司謂巴西已定開墾章程其待客民甚優不妨聽其招工因答以去年寓美國之猶太人赴巴西之招及到巴西則工資甚少至於衣食不給返美無資窘迫之至乃由美國駐巴西領事資遣回美此近事也該公

司語塞乃辭退 因查華工必由卡拿大以赴巴西如聽其招工則該公司得無限運載之利故以爲請彼固但求利己而不顧害人也如不知巴西情形則華人之受苦更有甚於古巴祕魯者矣

二十七日 陰天暖

接總理衙門公文言接田貝照會以希卡果賽珍會如有創辦之件他人效之者亦准入會比賽云云當交赴會之員彭光譽矣

因查昨日倫敦來電言美國鐵路火車股分票近日漸漲以英國商民知賽會期近火車運載之利百倍於平時故購之者多價驟漲也且各國人民赴會者總以萬計美國此舉他國之財流入本國共計二萬五千萬圓云云然則美國賽會築屋各費雖用四千

萬而尙可長二萬萬有餘且此四千萬築室之費仍美國之工人得之並不漏卮然則賽會之舉實生財之道也泰西心計乃如此其工哉

二十八日晴

西歷將屆歲終各大國旬稽進項聞美國上月出口六畜牛乳值銀一千零五十四萬三千圓法國郵政一年中得利一千萬餘圓各局已請增給工資英國核一年洋藥之稅共入銀一千九百萬圓農黨以他國五穀入口日多奪本國自有之利羣請加稅政府議行云 因謹按孔孟不言利以其利皆賡自本國之民也今日之勢不同矣泰西各國所取之利於入口之貨稅爲多棄而不取

則各國所產羣集於我而我民失業是瘠我而肥彼也消息他國入口貨物酌爲輕重其稅以保本國之利益以防銀錢之漏卮泰西各邦共揆一矣

二十九日 晴陰

日本國君現派大臣詳查與各國和約之不便於民有害於國者查出以備修改又德國請與俄國修改通商條約俄廷特派大臣將兩國所議條約查明是否有益可行茲該大臣等以爲無益遂不允德所請云 因按條約之定限年數修換者所以防損取益也願必籌之於平時而後施之於臨事且必有熟於時事之人而後知其何者爲損何者爲益又必有堅忍之力肆應之才而後能

折衝於樽俎之際收效於爭執之間泰西各國所以重專門名家也